

Ontmoeting 5

Die tempel word gebou

Salomo bou die tempel soos God voorgeskryf het.

Teks: 1 Konings 5–9

Hulpmiddels:

- Wol of maskeerband
- Leë bokse of eierhouers
- Maatband
- Prys vir wen-groep
- Skoenboks met prente van 'n palmboom, oop blom en gerub en ander versierings (om die tempel te bou)
- Tou of wol
- Koue lym
- Goue papier of spuitverf
- 8 koeverte (met **vetgedrukte** beskrywings binne in)
- Afdrukke van die “Feite Wiel”



Welkom

Speletjie: “Bou-bou”: Verdeel die kinders in groepies en gee vir hulle voorwerpe soos leë bokse (of boublokke / lego's), eierhouers, stoele of wat ook al in oorfloed beskikbaar is. Laat hulle dit binne een minuut so hoog as moontlik stapel sonder om enige geluide te maak. Gebruik 'n maatband om elke stapel te meet. Die wen-groep kry 'n prys.



Wyding

Stilwoord-ritueel uit Psalm 23: Laat die kinders kruisbeen sit en hulle oë toemaak. Herhaal 3 keer. “Die Here is by ons.” Sê nou hardop: “Omdat die Here my Herder is, is ek nie bang nie. Hy lei my deur die donker tye en Hy versorg my.”



Woord

Koning Salomo se pa, Dawid, wou baie graag vir die Here 'n huis bou. Vir 480 jaar het die Israëliete die Here in 'n tent aanbid. Hulle het dit die tabernakel genoem. Dawid het te veel oorlog gemaak, daarom kon hy nie die tempel bou nie. Salomo het van kleins af gesien hoe sy pa materiaal vir die tempel bymekaarmaak. Toe Dawid sterf, het Salomo God se belofte dat hy, Salomo, die tempel sou bou, onthou. Dit sou ook sy pa se droom bewaarheid. Salomo het geweet dit sou nie maklik of goedkoop wees nie, want hy wou net die beste materiaal gebruik om mee te bou. Hy het ook besluit om net die beste ambagsmanne te gebruik.

Die Here het self gesê hoe die tempel gebou moes word. Salomo mag nie daarvan afgewyk het nie.

Die les verloop verder as volg

Berei vooraf die volgende voor:

(Maak die tempel. 'n Alternatief is om 'n eetbare tempel te bou wat die kinders na die tyd kan eet.)

Kry h skoenboks. Knip die prente van h palmboom, oop blom en gerub uit en plak dit op die boks. Plak tou of wol oor die lyne van die prente en trek die boks oor met goue papier of spuit met goue spuitverf. Houtlym opsie: Doop tou/wol in koue lym. Sit h deurskynende plastieklaag op die prente. Omlyn die prente op die plastiek met die tou wat in die koue lym was. Laat dit hard word, haal dit versigtig van die plastiek af en plak dit op die boks. Rond dan af met spuitverf of goue papier.

*Kry genoeg koeverte en sit in elke koevert een van die volgende **vetgedrukte sinne** (aangeheg op volgende bladsy). Laat h kind h koevert trek en lees dit vir die groep hardop. Gee dan 'n kort beskrywing van die betekenis. Gebruik prente vir jonger kinders.*

Koevert 1: “Die Here het gesê die tempel moet dertig meter lank, tien meter breed en vyftien meter hoog wees.”

Tien meter is omtrent tien lang gestrekte treë. Tree dit af sodat die kinders kan sien hoe ver dit is. Dertig sal dus 3 maal soveel wees. Stel jou voor hoe hoog die tempel was.

Koevert 2: “Die Here het gesê daar mag geen geraas wees terwyl julle die tempel bou nie.” Salomo het gesorg dat al die kap- en saagwerk en enige ander geraas ver van die tempel af gedoen word. Alles is goed voorberei en dan saggies tempel toe gebring en daar in stilte ingesit.

Koevert 3: “Die Here het gesê die groot vertrek, die voorste Heiligdom, moet twintig meter lank wees.” Hierdie gedeelte het Salomo met goud oorgetrek. Die dak, die mure en die vloer was goud. Hy het ook teen al die mure, binne en buite, gerubs, palms en blomknoppe in houtsneewerk aangebring.

Koevert 4: “Die Here het gesê die binneste Heiligdom word die Allerheiligste genoem en daarin moet die ark gesit word.” Die ark was die kis waarin die Tien Gebooie was. Op die ark was twee engele wat vooroor sit met hul vlerke na mekaar. Salomo het twee groot engele, 5 meter lank, van goud laat maak. Hulle het agter in die Allerheiligste gestaan. Hulle vlerke was elkeen twee en h half meter lank en die punte van die twee engele se vlerke het aan mekaar geraak.

Koevert 5: “Die Here het gesê daar moet 'n altaar wees.” Voor die tempel het hulle h groot altaar van brons gemaak. Daarop is die diere geoffer. Die diere het vooruit gewys dat Jesus nog sou kom om vir ons sonde te sterf. Nou offer ons nie meer diere nie, want Jesus het klaar aan die kruis gesterf. In Salomo se tyd het hulle nog vir Jesus gewag.

Koevert 6: “Die Here het gesê daar moet 'n tafel vir die offerbrood wees.” Spesiale vars brood moes elke dag in die tempel wees.

Koevert 7: “Die Here het gesê daar moet kandelare in die Heiligdom wees.” Die kandelare word menoras genoem. Daar is sewe lampe aan elke kandelaar.

Koevert 8: “Die Here het gesê dit moet donker wees in die Allerheiligste.” Nêrens in die Allerheiligste was daar vensters nie.

Nadat die tempel gebou is, het priesters die ark in die tempel gesit. God het in h rookwolk die tempel gevul. Almal was verbaas. So het God vir hulle gewys dat Hy by hulle is. Salomo het namens die volk tot God gebid en die Israëliete aangemoedig om die tempel gereeld te besoek. Sodoende sou hulle deurentyd bewus wees van hoe getrou God is.

Die kinders kry tyd om oor die verhaal te dink:

1. Ek wonder aan watter deel van die tempel sou jy wou bou.
2. Ek wonder hoe dit sou voel om die heelyd in doodse stilte te werk.
3. Ek wonder hoe dit sou voel om in die tempel te wees toe die Here dit in h rookwolk gevul het.



Werskaf

- **“Feite-wiel”:** Gebruik die wiel om vrae oor die ontmoeting te vra. Die kinders kan elkeen een maak en huis toe neem.

- **“Bou jou eie tempel”**: Laat die kinders saam een groot tempel bou met die “welkom” aktiwiteit se hulpmiddels, en dit versier. Elke kind kan ook hulle eie tempel bou indien daar genoeg bokse is.

Sluit af met die seënbede

| |
|------------------------------------------------------------------------------------------------------------------------|
| 1. “Die Here het gesê die tempel moet dertig meter lank, tien meter breed en vyftien meter hoog wees.” |
| 2. “Die Here het gesê daar mag geen geraas wees terwyl julle die tempel bou nie.” |
| 3. “Die Here het gesê die groot vertrek, die voorste Heiligdom, moet twintig meter lank wees.” |
| 4. “Die Here het gesê die binneste Heiligdom word die Allerheiligste genoem en daarin moet die ark gesit word.” |
| 5. “Die Here het gesê daar moet ’n altaar wees.” |
| 6. “Die Here het gesê daar moet ’n tafel vir die offerbrood wees.” |
| 7. “Die Here het gesê daar moet kandelare in die Heiligdom wees.” |
| 8. “Die Here het gesê dit moet donker wees in die Allerheiligste.” |

Die tempel wat Salomo gebou het



Koning Salomo het al die konings van die aarde oortref in rykdom en wysheid.

1 Konings 10:23

